

讀史舉正

讀史舉正卷七

仁和張燾曠亮著

南史

宋武帝紀

帝彭城縣綏輿里人案宋書本紀作綏里人通鑑
注作綏德里人

楚元王交之二十一世孫也案宋書本紀交生紅
懿侯富富生宗正辟彊辟彊生陽城繆侯德德生
節侯安民安民生僖侯慶忌慶忌生肅侯岑岑生

宗正平平生東武城令某某生東萊太守景生
明經洽洽生博士宏宏生瑯邪都尉惺惺生魏定
襄太守某某生邾城令亮亮生晉北平太守膺膺
生相國掾熙熙生開封令旭孫旭孫生武原令混
混生東安太守靖靖生郡功曹翹是爲皇考自交
推之至帝爲二十二世不得言二十一世也

帝用參軍胡藩策襲剋臨朐案宋書作檀韶率參
軍胡藩馳往卽日陷城

餘姚唐亮藏匿亡命宋紀作虞亮

以西陵太守朱齡石爲益州刺史當從宋紀作西陽太守

乞伏熾盤拜河南公宋紀作乞佛熾槃

義真還爲赫連勃勃所追宋紀作佛佛虜

元熙二年六月壬戌帝至都甲寅晉帝禪位案壬戌書甲寅前誤

永初二年四月戊辰聽訟華林園案是月爲己卯朔不得有戊辰日宋紀書戊申華林園聽訟己亥以王仲德爲冀州刺史戊申書己亥前亦誤又

五月乙酉案文乙酉當在四月

上崩時年六十案文下接書七月疑落一七字宋紀作六十七

宋少帝紀

景平二年五月己酉皇太后廢帝爲營陽王宋紀作乙酉廢帝爲營陽王

案武帝少帝總論內晉自社稷南遷至收其實矣並襲宋書論文

宋文帝紀

永初元年加都督案宋書本紀帝前已都督荆益

甯雍梁秦六州矣是年進督北秦州非加也

元嘉十四年正月戊戌鳳凰二見于都下宋書符瑞志作三月丙申

十八年五月甲申河水汎溢宋書五行志作江水汎溢

二十四年四月河濟俱清宋書符瑞志作二月戊戌

帝崩于合殿案宋紀作含章殿合乃含之誤也

宋孝武帝紀

言身異下第一
元嘉三十年四月以江州刺史蕭思話爲尙書左僕射案宋紀二十八年孝武尙爲江州刺史及卽位以臧質爲江州刺史此屬思話誤

六月庚午以褚湛之爲尙書右僕射宋紀作庚戌案此文下書庚申而宋紀是月前有甲辰丙午戊申己酉等日則書庚戌爲是

閏六月庚申加江夏王義恭錄尙書事

宋紀無

又以

竟陵王誕爲揚州刺史

宋紀書甲午下

案義恭錄尙書已

見前此爲重出下七月書辛丑朔此月不得有庚

申宋紀書甲午是

孝建元年二月庚子案是年正月己亥朔二月不得有庚子

三年正月辛巳祀南郊案辛巳不當書庚寅戊戌下宋紀作辛丑是

大明三年八月乙巳剋廣陵城案下有丙子丙戌等日此不得有乙巳

海陵王休茂反參軍尹元慶起義斬之案宋紀作義成太守薛繼考討斬之

宋前廢帝紀

景和元年十一月癸巳殺太尉沈慶之案宋紀不
書日以自薨爲文

丁未皇子生少府劉暕子也宋紀作劉勝子

戊午安南侯敬深賜死宋紀作敬淵

案文帝孝武帝前廢帝總論
並襲宋書三論而稍變之

宋明帝紀

帝字景休宋紀作林炳

泰始二年正月乙未晉安王子勛僭卽僞位案文

當書下甲午戒嚴後

丙戌廣州刺史袁曇同逆宋紀作袁曇遠丙戌作
丙申案甲午下書丙申是

妖賊攻廣州殺刺史羊希宋紀作羊南

宋後廢帝紀

元徽二年五月壬午桂陽王休範反庚寅戒嚴壬
申賊攻新城壘案壬午距壬申五十一日不得並
在一月

湘州刺史張興世舉義兵案宋紀作湘州刺史王

僧虔雍州刺史張興世竝舉義兵此合爲一誤

冠軍將軍黃回北討宋紀作領軍將軍

宋順帝紀

帝字仲謨宋紀作仲謀

案明帝後廢帝順帝總論
竝襲宋書三論而稍易之

宋后妃傳

臧皇后母叔孫氏遷陵永平鄉君宋傳作封永陵

平鄉君

何皇后父瑀字幼玉宋傳作穉玉 又瑀尙豫章

康長公主諱次男宋傳作欣男

案后妃論文
半襲宋書文

宋宗室傳

義慶表舉前臨汝令庾實宋傳作臨沮 又處士

師覺授宋傳作師覺

劉懷慎傳

亮迎武當山道士孫懷道宋傳作孫道允

孫處傳

封新番縣五等侯宋傳作新夷縣

循父嘏奔始興宋傳嘏作擬

孟懷玉傳

卒官無子案宋傳懷玉子元此失書

王錫傳

子僧亮僧亮弟僧衍僧衍弟僧達案僧達爲宏少

子此云僧衍弟誤

袁湛傳

父質宋傳作文質 又子湛湛子植宋傳作湛子

桓

褚裕之傳

孫法先反以司馬文宣爲征西大將軍案宋傳法先作法亮文宣作文寅

寂之子曖宋傳曖作授

蔡興宗傳

累遷尙書吏部侍郎案文侍字衍

中書舍人宏興宗當是文誤宋傳作中書舍人王宏

徐廣傳

年過八十猶歲讀五經一遍案宋傳廣卒時年七十四此云八十疑誤

撰晉紀四十二卷宋傳作四十六卷

柳元景傳

義恭薦元景乃以爲武威將軍案宋傳惟書義恭以元景爲廣威將軍無薦元景句

陸澄傳

年位已高當從南齊書作年已倍令君爲是

卒諡靜子南齊書作靖子

誣爲買券南齊書作賣券

陸玠傳

玠梁大匠卿晏子之子案陳書無上字字

劉懷珍傳

祖昶青州中從事南齊書作青州治中

劉靈哲傳

夢黃衣老公與藥曰可取此食之案南齊書作可
取南山竹筍食之并無與藥二字

劉霽傳

字士湮梁書作士烜

梁武帝諸子傳

吳郡屢水災案下文太子疏曰使吳興一境無復水災又云吳興累年失收則吳郡當爲吳興郡也梁書作吳興郡是

遣交州刺史王奕發吳吳興信義三郡人丁案梁書奕作弁信義作義興

襄陽人梁話魏書作安定梁話又淮陰苗文寵

魏書作濟陰芮文寵

陳宗室傳

信威將軍祐封豫甯縣侯案陳書作信武將軍祐
封豫章縣開國侯

侯瑱傳

王琳軍保西岸東西風吹其舟艦陳書作東北風
黃法氈傳

太平元年割江西四郡案西字誤當從陳書作江
州

爲拋車陳書作拍車

言身集卷十
九
淳于量傳

出爲桂陽刺史案陽字誤當從陳書作桂州

降周將長湖公元定等陳書作長胡公拓跋定等

北史

魏本紀

積六七十代魏書作六十七世

威皇帝僧魏書作僧

神元帝四十二年遣子文帝如晉是歲晉景元二年也案景元乃魏陳畱王奐年號時晉未受禪不

得云晉魏書作如魏爲是

穆帝三年劉琨遣子導爲質案晉書劉琨傳導作

導

魏書同

孝文帝太和元年伊祁苟自稱堯後魏書作伊祁
苟初 又皮喜攻陷葭蘆魏書作懼害 又栗楊
婆國遣使朝貢魏書作粟提婆國 又五年任城
王靈薨魏書靈作雲

隋本紀

開皇二年七月癸巳誤以下三年二月己巳朔推

詩經卷一
之是年七月無癸巳

三年十二月乙卯誤案隋書此失書閏字

五年四月戊申上誤書乙卯當從隋書作乙巳

六年正月壬申上書庚子誤隋書作庚午爲是

九年六月丁卯以盧愷爲禮部尙書案隋書作丁

丑

十六年八月庚戌決死罪隋書作丙戌

十八年八月丙子誤當從隋書作七月

大業元年五月甲子誤以上正月壬辰朔推之甲

子當在六月

八年三月癸巳下戊戌上書甲子誤當從隋書作

甲午

又五月戊午

隋書作壬午

七月壬午

隋書作壬寅

十

月戊寅

隋書作甲寅

竝當從隋書

九年十二月甲辰書丁亥上誤

十一年八月乙卯以上甲午朔推之誤當從隋書

作乙丑

十三年五月辛卯誤以上二月壬午推之本月無

辛卯

言身錄卷之十一
義甯二年正月壬戌下書庚戌誤

魏后妃傳

桓皇后惟氏魏書作祁氏

獻明皇后避難中路失道案魏書作失轄是與下
輪正不傾相應

明元密皇后薨諡曰貴嬪案魏傳作諡曰密貴嬪
此遺密字

尔朱榮傳

以銅鑄咸陽王禧等五王子孫案魏書作六王子

孫爲是

害彭城霸城二王案霸城當爲公卽始平王子正也

吐谷渾傳

分戶七百晉書作一千七百戶

一迴一迷宋書作一向一遠

大將絕拔渥晉書作紇拔泥宋書作絕拔渥

葉延子碎奚晉書作辟奚

舊唐書

地理志

汝州魯山縣武德四年于縣置魯州正觀元年州廢案新書地理志注魯州正觀九年廢又下葉縣注云正觀八年隸魯州然則八年尙有魯州其廢當在九年非元年也

魯州領魯山滎陽二縣州廢仍置滎陽縣以魯山屬汝州案新書魯州廢省滎陽省字最確如曰仍置則州已廢

雅州但有州名無屬縣亦無實土案新書領嚴道

廬山名山百丈榮經五縣土貢有麩金茶石菖蒲
落鴈木

后妃傳

太穆皇后文德皇后傳竝云上元元年改上尊號
曰太穆順聖文德順聖案順聖二字乃天寶八載
所加上元則曰太穆神皇后文德聖皇后也

高宗廢王后及蕭良娣武昭儀令人縊殺之案後
又云截去手足投酒甕中數日而卒自相違反
良娣生義陽宣城二公主必當進號史失之又

良娣乃太子宮人位號必高宗藩邸稱之卽位後已進淑妃而仍其舊稱耳

睿宗肅明后劉氏刑部尙書德威孫案本傳德威仕終同州刺史前此嘗爲刑尙耳

昭成后竇氏將作大匠抗曾孫祖誕大理卿案本傳抗仕終左武侯大將軍誕仕終宗正卿此所書則皆前官也

元宗后王氏父仁皎加邠國公案本傳作祁國元獻皇后楊氏宏農華陰人案隋志華陽屬京兆

本書志屬華州天授中屬虢州尋卽復故又虢州至天寶初始改宏農郡此時未也二十四年忠王爲太子案本紀在二十六年六月

楊貴妃傳武惠妃開元二十四年薨案文四當爲五楊家與廣平公主爭門案新書公主傳及楊妃傳俱作廣甯虢國男裴徽尙代宗女延安公主案新書公主傳延安爲肅宗女

肅宗張皇后南陽西鄂人案新書作鄧州向城人爲是地理志南陽無西鄂向城乃故西鄂縣地

肅宗吳后開元二十三年元宗賜之案本紀代宗以開元十四年十二月生則吳后之賜當在十三年二字誤衍 又后叔令瑤封馮翊郡公兄澈鄆城縣公湊臨濮縣公案本書外戚傳令瑤與澈溱俱封濮陽郡公前後互異

代宗崔妃父岫母楊氏韓國夫人妃生召王偁案本書楊妃傳韓國夫人壻崔珣而此云岫又偁乃代宗之弟肅宗諸子傳已明云崔妃生召王偁矣而此傳又以爲代宗之子何疏舛乃爾

德宗韋氏正元二年冊新書作四年案昭德王后以淑妃卒于正元三年新書爲長

順宗莊憲后王氏生遂安公主案新書公主傳作晉安

憲宗懿安后郭氏幸驪山上命景王率禁軍侍從案穆諸子傳無景王宣宗繼統恩禮愈異于前朝案新書言帝奉養禮薄甚詳此傳失寔

孝明后鄭氏未見入宮之由大中末崩案新書后李錡侍人錡誅入掖庭又案紀崩在咸通六年十

二月

昭宗何后生德王輝王案昭十子傳無輝王

外戚傳

吳湊建中初爲通州刺史案地理志無通州

新唐書

高祖紀

七世祖鬻案上推當以高祖爲一世父昞爲二世
昞父虎爲三世虎父天賜爲四世天賜父熙爲五
世熙父重耳爲六世重耳父欽爲七世欽父鬻爲

八世不得言七世也

大業十三年擊賊甄翟兒于西河破之案隋書煬
帝紀在十二年十二月

石艾縣長殷開山爲掾案本傳作大谷縣長

石艾大谷

俱屬太
原郡

劉政曾爲屬案本傳作戶曹參軍

七月丙寅隋鷹揚府司馬李軌起武威案隋書丙
寅作丙辰軌本傳司馬作司兵

武德二年閏二月竇建德陷邢州辛丑殺宇文化

言二卷一
及于聊城案建德本傳以元年殺化及在陷邢州
前當從本傳爲是

八月鄴國公薨案隋書本紀在夏五月

十二月永安王孝基及劉武周戰于下邳敗績案
武周本傳夏縣人呂崇茂殺其令以應賊高祖詔
永安王孝基與于筠等攻夏縣不克軍城南崇茂
與賊將尉遲敬德襲破孝基軍則是戰于夏縣非
下邳也以地言之夏縣與下邳相距亦遠當從傳
爲是

代宗紀

大厯十年十月昭義軍節度使李承昭及田承嗣戰于清水敗之案清水當爲臨水臨水卽昭義屬磁州正與攻磁事合若清水則正觀時已省入魏州冠氏距磁遠矣

僖宗紀

乾符三年十一月王仙芝陷郢復二州四年三月黃巢陷鄆沂二州八月陷隋州案巢傳殘郢復二州轉入申光殘隋州據安州分擊廬壽等州尋降

復叛分其眾巢北掠齊魯入鄆州然則陷隋當在
鄆復後不應在鄆沂後以南北遼絕故也傳是
中和元年三月鄭畋及天雄軍經略使仇公遇盟
于鳳翔案鄭畋傳與涇原程宗楚秦州仇公遇鄭
延李孝恭夏州拓跋思恭盟據傳諸鎮皆近鳳翔
天雄乃魏州遠矣五代史職方考秦州蜀曰天雄
時未有蜀安得預稱紀誤

地理志

汝州襄城縣注云隸許州天寶七載來屬舊書天

寶元年以許州之襄城來屬案是年改汝州爲臨汝郡縣或因之改屬則七載當爲元年也

葉縣注云開元三年以葉襄城及方城西平舞陽置仙州案舊書作開元四年

許州郛城縣注正觀元年郛城隸蔡州案蔡州乃寶應元年更名正觀初當爲豫州也

邢州唐初有柏人縣見後漢光武紀李育屯柏人注志失之

趙州縣八案舊書領十一縣尙有樂城藁城鼓城

安州縣六案舊書領八縣尙有京山富水

道州延唐縣注本梁興更名唐興天寶元年又更名案唐興高宗時屬永州見後漢書光武紀注

松州嘉城縣通典作嘉誠

靜州靜居縣通典作靜川

新州縣二案通典領三縣尙有索盧

蠻州通典作蠻州

瀼州瀼江縣通典作臨江

籠州龍額縣通典作龍賴

嚴州循德郡乾封二年置案通典作三年循德作
脩德下縣名循亦作修

融州縣二案通典領三縣尙有黃水又武陽作武
陵

太穆寶皇后

后京兆平陵人案隋書地理志京兆有始平無平
陵舊書本傳作始平爲是

文德長孫后傳

高祖穉馮翊王案隋書長孫覽傳作上黨王

舊書長孫

無忌
傳同

父晟字季仕隋爲左驍衛將軍案隋書晟傳字季

晟右驍衛將軍

舊書后傳
亦作右

后疾會柴紹等急變聞案紹傳無此文義亦不明

高宗廢皇后

后良娣囚宮中武后詔剔其手足反接投醢甕中

夫手旣剔矣反接者何物乎

則天武后傳

兄子惟良懷運案宰相世系表二人乃士讓子后

之從兄也

元慶爲宗正少卿外遷龍州案志龍朔二年宗正改司宗又龍州正觀元年曰龍門州

徐敬業取潤州殺刺史李思文案思文附敬業傳無被殺事又此傳後有春官尙書李思文卽其人也

薛懷義拜左威衛大將軍案志光宅元年改左右威衛曰左右豹韜衛

右武衛兵曹參軍屈貞筠案志光宅元年改左右

言上集二卷一
武衛曰左右鷹揚衛

和思趙后傳

帝爲英王聘爲妃案文英當爲周帝徙封英王后
已死矣

韋庶人傳

詔將軍趙承福薛簡衛譙王案譙王傳作趙承恩
薛思簡 舊書韋后傳命左金吾大將軍趙承恩
及宦者左監門衛大將軍薛崇簡加宦者二字以
別于太平公主之子薛崇簡也然則薛簡思簡皆

誤矣而舊書中宗紀作薛簡仍自牴牾何也

后兄溫族弟濯播宗子捷璿璿甥高崇案宰相世系表播乃溫從子璿其族弟也又溫同行有璿有濬濬爲衛尉少卿此云分領屯營疑是濬也舊書后傳亦作溫從子播捷族弟璿外甥高崇

上官昭容傳

父延芝案文延當爲庭上官儀傳可據

昭成寶后傳

曾祖抗父孝諱自有傳案孝諱本書失載舊書人

外戚傳

正順武后傳

弟忠國子祭酒信秘書監案宰相世系表武攸止
子昕忠信忠傳誤又表云昕忠鴻臚卿 潘好禮
曰妃再從叔三思從父延秀案延秀乃武承嗣子
三思從于于妃爲從兄云從父誤

楊貴妃傳

建平信成二公主案公主傳元宗女有信成無建
平

章敬吳后傳

肅宗在東宮李林甫陰搆不測太子內憂元宗幸其宮左右無嬪侍詔選良家子侍太子后在中生代宗案舊書代宗紀以開元十四年十二月生肅宗以二十六年六月始爲太子而林甫搆韋堅以危太子則在天寶五載傳非又云年十八薨案舊書二十八年薨當亦因字形致誤

正懿獨孤后傳

帝爲廣平王時秘書少監崔岫妻韓國夫人以其

女爲妃生子偲所謂召王案召王偲乃肅宗子代
宗弟其行第皆以人字可證且十一宗諸子傳已
在肅宗十四子之列而此傳仍舊書之誤前後殊
不相應

睿眞沈后傳

德宗卽位詔贈后曾祖士衡人保祖介福太傅父
易直太師案舊書后傳贈后父易直太師易直子
介福太傅介福子士衡太保其世次之違戾至矣
又正元七年贈外高祖琳爲司徒舊書作外曾

祖

韋賢妃傳

祖濯尙定安公主案舊書妃傳不知氏族所出此
云祖濯未知何據

莊憲王后傳

元和十年崩案紀在十一年三月

恭僖王后傳

太和五年詔稱義安太后案舊書作八年

宗室傳

畢王璋二子韶孝基案表韶雍王繪子

襄武郡王琛隋義甯初封襄武郡公武德初始王
案唐初于諸郡皆改州其封諸王皆仍隋舊名獨
襄武隋志無此郡未知何故

河間王孝恭子崇義晦崇義歷蒲同二州刺史案
表蒲同絳陝幽夏六州刺史又晦作崇晦

淮安王神通子孝銳有子齊物顯案表齊物孝銳
孫

齊物貶竟陵太守還遷京兆尹案舊書入爲司農

卿尹京兆在後

膠東王道彥爲媯州都督案舊書作涼州爲優媯
州無都督府

孝友河閒王案表作孝本別有孝友爲尙書左丞
梁郡公孝逸進鎮軍大將軍案志無鎮軍

淄川王孝同孫廣業劍州長史案文長當爲刺劍
州非都督府安得長史

表同此誤

孝節曾孫暠案表暠孝節孫 暠使吐蕃還遷吏

部案舊書轉兵部

襄邑王神符子德懋少府監孫模仕終太子賓客
案表德懋刑部尙書模司農卿太子賓客乃模子
詞也

世祖四子長澄次湛洪次高祖案表高祖居長
隴西王博父高宗時擢累禮部尙書爲帝所鄙案
舊書作高祖爲是又表作宗正卿

高祖諸子傳

韓王元嘉正觀九年封韓遜滑州都督案文九當
爲十滑當爲潞

鄭王元懿十子長璩嗣王爲鄂州刺史案表王止九子長璩嗣王遂州刺史

霍王元軌六子案舊書子七人表止五人

虢王鳳長子翼嗣爲平陽王案翼嗣虢王平陽王其初封耳 次子茂融案舊書作第五子表在第四

道王元慶薨九子誘爲嗣王臨淮案文當云臨淮王誘爲嗣

魯王靈夔孫道邃終尙書右丞案表及舊書俱作

言
宗正卿

密王元曉徙澤州薨案舊書後歷徐州刺史薨
子穎嗣爲南安王案文當云子南安王穎爲嗣
滕王元嬰少子修信案舊書作瑒表作瑒

讀史舉正卷八

仁和張烜曠亮著

新唐書

王世充傳

出爲江都贊治遷郡丞案隋書百官志煬帝改贊務爲郡丞此傳似贊務一官郡丞又一官矣

竇建德傳

上谷賊王須拔以兵略幽州戰死案本紀武德元年十一月竇建德敗王須拔于幽州須拔亡入于

突厥則是須拔固未嘗戰死幽州也

十三年自立爲長樂王十四年五月更號夏王案
大業十三年卽義甯元年明年三月煬帝卽遇弒
矣安得稱十四年乎

薛舉傳

大將慕容羅睺李安遠劉宏基皆沒案軍沒與身
沒異是役也劉宏基僅被擒李安遠亦無恙二人
本傳可見文云皆沒一似身沒然者義不分明
又李安遠本傳不及此戰事亦疏

薛仁果傳

舉父子盜隴西五年滅案薛舉以大業十三年四月癸未反武德元年七月辛巳舉卒己丑秦王討仁果十一月己酉執之癸亥俘仁果以獻然則舉父子自起至滅凡二年耳五年之說未知何所據也

蕭銑傳

擢爲羅川令案隋書煬帝紀大業十三年十月羅令蕭銑反地理志羅縣屬巴陵郡非羅川也

隋將張鎮州隋書作鎮周

偽將雷長頴以魯山降案地理志汝州魯山注王世充置魯州世充以武德四年五月降銑以此年十月亡則魯山未應屬銑又隋書地理志襄城郡魯縣卽唐魯山也文亦無山字

沈法興傳

法興湖州武康人案隋書地理志武康自隸餘杭郡未嘗隸湖州且湖州卽吳郡之烏程仁壽中置大業初州已廢不得仍言湖州也

大業末爲吳興郡守案隋書地理志烏程舊置吳興郡平陳郡廢入焉是大業中未嘗有吳興郡也當爲吳郡之訛耳

李子通傳

子通沂州丞人案隋書地理志注開皇十六年分丞置鄆州及蘭陵縣大業初州廢併蘭陵入焉尋改丞爲蘭陵隸彭城郡然則丞固未嘗屬沂州也又案本書地理志沂州丞縣注本蘭陵武德四年置鄆州更名丞正觀元年州廢以丞來屬此傳據

唐初州縣爲又耳

薛萬徹傳

遂傳泊灼城糾繆云本紀及高麗傳皆泊灼城案
地理志有載賈耽考邊州入四夷之路內有營州
西北路一節內云泊灼城又有登州東北路一節
內有泊灼口似泊灼是也

房元齡傳

元齡齊州臨淄人案隋書及本書地理志臨淄屬
北海郡不屬齊州

李吉甫傳

改郴饒二州案舊書吉甫爲忠州刺史六年不徙尋授柳州刺史郴或柳之訛

顏真卿傳

師古五世從孫案舊書杲卿傳曾伯祖師古曾祖勒禮祖甫父元孫則真卿爲師古四世從孫非五世也舊書真卿杲卿傳並云五代祖之推亦謬之推乃師古之祖至真卿爲六世矣

卒時年七十六案曾南豐魯公祠堂記云是時公

年七十有七矣不知何據

竇羣傳

羣京兆金城人案金城至德二載已改名興平矣

顏師古傳

其先琅邪臨沂人祖之推自齊入周終隋黃門郎

遂居關中爲京兆萬年人案北齊書之推傳齊時

爲黃門侍郎入周大象末御史上士隋開皇中太

子召爲學士以疾終

北史同

新書誤當從舊書作齊

黃門侍郎爲是又案後周大興郡隋曰京兆唐初

曰雍州開元初復曰京兆周置萬年縣隋改大興
唐初復故然則據之推而言當云大興萬年人據
師古而言當如舊書云雍州萬年人

獨孤懷恩傳

懷恩元正皇后弟也懷恩幼隋文帝獻皇后以姪
養宮中糾繆云元正皇后卽高祖母而高祖紀云
隋文帝獨孤后高祖從母也由此言之元正后與
文獻后乃姊妹而懷恩則弟也安得謂之姪哉案
是傳下云帝嘗與戲曰弟姑子悉有天下次當爾

耶所謂姑子者蓋帝自謂及煬帝也弟者表弟也舊書外戚傳作元正皇后弟之子也確甚然則新書之誤不在姪字蓋脫之子二字耳吳縝之言非也

庵下元君寶案唐儉傳君寶作君實

開府劉讓案劉讓應作劉世讓

田承嗣傳

大厯八年相衛薛嵩死弟萼求假節牙將裴志清逐萼萼以眾歸承嗣案以眾歸者志清也非萼也

文多一萼字又代宗紀事在十年正月丁酉昭義軍兵馬使裴志清逐其節度使薛萼叛附于田承嗣此云八年誤又萼當作萼

李靈耀以汴州叛詔李忠臣李勉河陽馬燧合討案文與本紀合是役未嘗有李正已也而下文忽云已正已將尹伯良敗疎甚考正已及忠臣燧傳皆無正已討靈耀事

田緝傳

華太常少卿尙永樂新都二公主案公主列傳書

代德三朝公主無號永樂者但有新都公主下嫁
田華耳

李正己傳

逐侯希逸出之有詔代爲節度使遂有淄青齊海
登萊沂密德棣十州與田承嗣等輔牙相倚案方
鎮表廣德元年滄德二州隸魏博節度正己之逐
希逸在永泰元年是時德州屬魏博田承嗣矣其
後八節度奉詔討承嗣李正己乃攻拔德州語在
承嗣傳中表云大厯十年淄青平盧節度又領德

州卽此然則正己初代之時固未嘗有德州也考
方鎮表寶應元年以登萊沂海泗隸淄青平盧節
度使則德州當爲泗州耳

李師道傳

師道異母弟也案文當云師古異母弟也減二字
卽害本義此與下署知密州正同所謂苟簡者是
也

西域傳

以其地爲懿嵯麟可三十二州案三十二當作二

十五

黃巢傳

王仙芝攻汝州刺史走案本紀乾符三年九月仙芝陷汝州執刺史王鐔非走也

通鑑同

前鴻臚卿李琢案本紀琢乃宮苑使

以元裕爲招討使案本紀元裕爲招討及破賊皆在乾符五年正月王仙芝伏誅之前

五代史

梁太祖紀

拜溫左金吾衛大將軍案新唐書本紀左作右

文德元年三月庚子僖宗崩案新唐書本紀作癸卯

開平元年封子友文博王友珪郢王友璋福王友正均王友徽建王案家人傳尙有友雍賀王

梁末帝紀

太祖第三子友正也案家人傳太祖八子長曰友裕次曰友珪友璋友正則末帝乃第四子也

唐明宗紀

言身異工卷八
長興二年十一月戊申誤書辛丑前

唐廢帝紀

清泰三年五月乙卯誤書戊申前

晉高祖紀

天福三年十月戊子下戊戌上書己未誤

四年十二月書乙亥戊子等日以下五年正月丁卯朔推之乙亥戊子當在十一月

晉出帝紀

開運二年十一月戊戌下書己巳誤

周世宗紀

顯德五年重書三月

梁家人傳

文惠皇后單州單父人元正皇后單州碭山人案
新唐書地理志光化二年朱全忠以宋州之碭山
單父虞城曹州之成武表置輝州又本史職方考
後唐滅梁改輝州爲單州是梁時固未嘗有單州
也

正明四年友能以陳州兵反案本紀在龍德元年

脫一友字

晉臣傳

景延廣徙領甯江軍節度使案甯江軍不見職方考

司天考

晉天福三年正月戊申朔七年四月甲寅朔日食
周顯德三年正月戊申五年十一月辛未月食見
五代會要史缺

宋史

太祖紀

建隆元年六月癸酉下書辛未誤當從長編作辛巳

八月戊子南唐進賀平澤潞金銀器以千計案上七月乙丑己書南唐進白金賀平澤潞矣此重書二年閏三月壬辰書丁丑癸未前誤

三年二月丙辰書甲午乙未前誤又己亥下書壬午亦誤以正月庚申朔推之壬午當在正月

乾德元年七月丙寅書丁巳己未癸亥前誤丙寅

當爲丙辰

十二月己巳以下閏月己酉朔推之當爲乙巳
開寶二年二月己酉書乙卯戊午後誤當爲己未
也

五年四月庚寅朔下書丙寅當爲丙辰之誤下五
月書庚申可見

七月庚寅以上己未朔推之是月不得有庚寅

仁宗紀

明道二年十二月廢皇后郭氏居長甯宮案后妃

傳作長樂宮

景祐元年九月庚辰詔立皇后曹氏十一月己丑冊曹氏爲皇后案后妃傳云九月冊爲皇后則十一月不應複見也

嘉祐二年三月乙未契丹使耶律防陳凱來求御容案北盟會編在七月

徽宗紀

元豐五年十月丁巳生案王明清揮塵前錄云十月十日

言身是二名
大觀元年八月丁巳封于構爲蜀國公案高宗紀
作八月丁丑

政和七年十二月戊午朔案上十月乙卯朔下重
和元年正月甲申朔則是月當是甲寅朔也

重和元年二月庚子遣武義大夫馬政由海道使
女真案會編在是年四月二十七日己卯又紀中
上言正月甲申朔則二月亦不應有庚子

宣和元年二月庚辰改元宣和案會編云三月丁
未朔

二年二月趙良嗣使金案會編乃三月六日事

四年九月戊午朝散郎宋昭上書諫北伐案會編
在六月

十月己亥耶律渚妻蕭氏上表稱臣案會編是年
十月十三日戊戌蕭后表至則是前一日也

十一月戊寅金人遣李靖等來案會編乃二十一

日丙子事

五年正月辛酉以王安中爲慶遠軍節度使燕山
府路宣撫使案會編乃五年二月十一日乙未事

并云靖難軍節度非慶遠也

欽宗紀

元符三年四月己酉生案揮塵前錄云四月十三日

高宗紀

大觀元年五月乙巳生案揮塵前錄云五月二十一日

建炎三年八月己未太后發建康案下文閏八月丁丑朔則己未乃八月十二日或爲十三日而揮

塵三錄所載李正民日記云八月十六日隆祐登舟九月辛亥次平江府是月丙午朔辛亥乃九月六日而記云九月八日行在平江府十月壬辰帝至越州是月丙子朔壬辰乃十月十七日而記云十月十三日行在越州十一月庚午范宗尹叅知政事是月乙巳朔庚午乃十一月二十六日而記云十一月二十七日以范宗尹叅知政事十二月丙子帝至明州是月乙亥朔丙子乃十二月二日而記云十二月五日車駕至四明李係目見之事

所記自確宜從

孝宗紀

建炎元年十月戊寅生案揮麈前錄云十月二十
二日

后妃傳

顯德五年太祖爲都點檢案太祖紀乃顯德六年
也

童貫傳

政和元年使遼得馬植歸馬植傳植謁貫奇之載

與歸是貫植同在元年歸也案北盟會編云約其
來歸北征紀實云政和二年燕人馬植歸封有功
編年則云政和五年三月李良嗣遣人來雄州投
蠟丸四月九日入雄州有旨令赴闕十八日見于
延慶殿所記甚詳宜可據然北征紀實云植來歸
上傳旨問可納否植先已藏于童貫家矣據此則
其來之曲折或皆貫之秘計所爲也

郭藥師傳

宣和五年正月同知燕山府案會編是年六月一

日壬午藥師除燕山府宣撫副使同知燕山府非正月也

資治通鑑

漢紀

更始二年光武畱耿弇署長史案袁紀范書作門下史

光武至下曲陽案東觀記和成郡治下曲陽此時和成卒正邳彤尙未降又范書光武紀降下曲陽亦在度呼沱河之後鑑書千前益仍王霸傳之誤

耳

和我太守當爲和成卒正

更始遣益州刺史李忠徇蜀漢案范書公孫述傳
作張忠

建武元年鄧禹至箕關注賢曰今王屋縣余據唐
王屋縣屬懷州案唐書地理志此乃正觀元年事
顯慶二年改隸洛州然則賢注范書之時固已不
屬懷州矣

北擊尤來大搶五幡破之案范書本紀在四月公

孫述稱帝前此在後未詳

晉紀

泰始元年吳紀陟洪璆來聘案吳志作宏璆

九月乙未大赦案下有乙亥上不得有乙未此仍
魏志之誤 戊子以何曾爲丞相案是月無戊子
魏志晉書俱作戊午

冬吳徙都武昌案吳志在是年九月非冬也

二年六月丙午晦案晉書武紀作七月爲是以下
十月丙午朔推之可證

九月詔自今奏得可而于事不便者不可隱情案
晉書武紀此詔在四年九月

五年巴西文立上言案晉書立傳巴郡臨江人
考異曰泰始七年立舉卻詵案詵傳泰始中詔天
下舉賢良直言之士立舉詵而武本紀此詔在四
年十一月非七年也

十月封皇子景度爲城陽王案晉書武紀在十一
月

七年陶璜襲董元考異曰璜傳云徑至交趾元乃

九真太守非交趾也案九真在交趾西南卽云至交趾亦可

陳騫言胡烈牽宏勇而無謀注云時騫以大司馬都督揚州案晉書騫傳以車騎大將軍出督揚州與武紀合胡注附會失考

咸甯三年平虜護軍文騫討樹機能案晉本紀作文淑扶風王駿傳作文倣

八月封賈充爲魯郡公案晉本紀充封在帝受禪之初據職官志此時特增戶邑而已

十二月吳孫愐入江夏汝南注二郡相去甚遠晉
末夏口立汝南縣此時未有也案晉書祜傳吳人
寇弋陽江夏卽此事弋陽故屬汝南或其時愐兵
分入耳

吳志在
是年夏

元康元年廢楊太后中書監張華議案晉書華傳
華時爲太子少傅及楚王瑋誅乃拜中書監

九年太子洗馬江統作徙戎論案晉書統傳作論
在爲洗馬前

永康元年以成都內史耿縣爲益州刺史注太康

九年改諸王國相爲內史案晉書武紀在太康十年

西渡江源注江源縣李雄分立江源郡晉改多融縣又改晉原縣案晉地理志雄所立漢原郡耳蓋治江源縣又桓溫滅蜀改郡爲晉原縣爲多融則是郡有晉原之名而無江源縣有江源之名而無晉原也

南安魚涪津注宋白曰榮州嘉州皆漢安南縣地案文安南當爲南安

扶風李攀注泰始二年分扶風置始平郡案晉志作三年

永甯元年蜀郡太守李懿斷北道案李特載記作懿爲太守

華陽國志同

河閒王頠至案晉書頠傳齊王冏起義頠遣張方李含應之至潼關而倫已誅各率眾還是頠未嘗自行安得云至

六月乙卯齊王冏入洛陽案晉書頠冏二傳皆不言至洛月日然頠雖先至傳言使趙驤等助齊王

攻張泓泓降始入洛亦不應相距四十餘日也此雖別有所據然不可從

太安元年朱提李猛注朱提縣唐爲曲州之地案文曲當爲戎

武帝族弟范陽王虓注虓東武城侯植之少子案虓乃虓孫范陽王綏子注誤

二年劉宏退屯梁注梁縣屬汝南郡案晉志梁縣屬河南郡

荊州十郡注荊州時已分襄陽武昌安成屬江州

案晉志惠帝分桂陽武昌安成爲是

永興元年下載成都王穎鎮鄴時表劉淵爲冠軍將軍案淵載記時表淵行甯朔將軍至惠帝伐穎乃以爲冠軍將軍

甯北將軍注晉制方面之任有四征四鎮四安四平無四甯甯當作安案晉書王俊傳由甯北將軍進號安北新蔡王騰傳亦由甯北進位安北丁紹傳以討汲桑有功加甯北將軍郗隆加甯東將軍見本傳

永嘉元年斬陳敏于建業傳首至京師案建業卽京師不必傳首敏本傳至江乘爲義兵所斬前後事相應建業之說出甘卓傳本與本紀送首之言相戾此文失于檢察用之

十二月王彌降漢案晉書彌傳彌敗自洛陽與劉靈歸元海元海郊迎敬待署彌司隸校尉加侍中特進彌固辭其後進征東大將軍封東萊公又云彌見元海勸稱尊號今檢本紀及淵載記淵稱帝去彌降不遠先後情事頗合鑑削去勸稱尊號而

拜大將軍封東萊公在前郊迎拜司隸校尉加侍
中特進在後似覺倒錯

三年譙登爲梓潼內史案梓潼非國不當稱內史
五年四月西河王喜注喜宣帝弟西河王斌之後
案宗室傳斌乃宣帝弟通之子

六月丁未朔案下有辛卯壬辰丁酉丁未等日此
當爲丁亥

荀藩以前冠軍將軍褚爽爲梁國內史案晉書爽
傳初補冠軍參軍洛陽覆沒明年荀組以爲參軍

頃之荀藩以爲梁國內史鑑誤叅爲將且其事不
在此年六月

六年正月辛未甲戌案下二月壬子朔則是月不
得有此二日

九月漢衛尉梁芬奔長安案晉書懷紀及閭鼎傳
芬與鼎等同擁立愍帝非漢臣也或曾降漢爲衛
尉耳

十月劉曜敗踰蒙山歸注五代志太原郡石艾縣
有蒙山又晉陽縣有蒙山蓋蒙山跨晉陽石艾二

縣界也案石艾卽上艾今平定州在府東二百八
十里晉陽今太原縣在府西南四十五里相距遼
絕蒙山安得跨二縣界顧景范曰平定別有蒙山
非一山此注誤

十二月麴允與馮翊太守梁肅等合兵攻閭鼎案
晉書鼎傳作馮翊太守梁緯北地太守梁肅此并
爲一人疑有關文

江陽太守張啟注江陽隋併入陵州隆山縣唐爲
眉州彭山縣案晉之江陽卽隋唐之瀘州瀘川郡

也與陵州睢州遠矣

建興元年二月己卯案上正月丁丑朔則二月不得有己卯

十月麴璆追趙染與劉曜遇于零武注零武爲前漢北地郡魏咸陽郡之靈武案此乃零武鄉在今咸陽縣東卽魏咸陽郡之靈武漢靈武則今甯夏府南去此遠矣合而爲一誤又後三年麴允去黃白城軍靈武卽此注云北地靈武縣亦誤

建武元年三月辛卯下辛丑上書丙辰誤又以上

年十二月乙卯朔推之并無丙辰日

咸和九年十月癸亥朔案下咸康元年正月庚午朔則是月癸亥非朔日也

永和六年閏月考異曰長厯閏二月帝紀閏月有丁丑己丑案是歲正月癸酉朔若閏正月卽無丁丑己丑今如考異所云閏月當置二月之下仍置二月上誤

十年二月乙丑案上正月己酉朔二月不得有乙丑晉書本紀作己丑爲是

興甯三年七月己酉壬子下書甲申案己酉至甲申凡三十六日安得在一月

咸安元年淮南太守桓伊破秦兵伊宣之子也案晉書宣傳伊乃宣族子伊傳父景仕至侍中丹楊尹護軍將軍長社侯宣則仕至梁州刺史封竟陵縣男二人判然不同鑑合爲一誤

齊紀

蕭衍從舅范陽張宏策注衍母張氏宏策之從父弟案梁書宏策傳云文獻皇后之從父弟也注以

后爲宏策弟誤

隋紀

賀若弼請緣江防人交代必集廣陵案隋書弼傳
作必集潁陽

跋

讀史舉正八卷皆南漪先生隨筆識語歿後其子始錄成帙全先生謝山譔墓志詳言之乾隆丙午先生再傳弟子許烺曇孫爲之雕板後嘉定錢氏高郵王氏諸家書出世士不復置意遂無過問要其所舉誠略間有諸家所未及者弗可棄也同治己巳余過杭州曹丈竹書年七十猶留意鄉先輩箸述屬覓此書及范介祉先生春秋上律表越二年得之都市求上律表不可得丈時已老病未寄也又五年丈竟以文

字獲罪尋卒余亦儒冠誤身溷跡俗吏無可自效撫
今懷昔寂莫何論爰取舊本重與校栞冀九京有知
兩無責焉辛巳八月會稽趙之謙